

四庫全書

經部

欽定四庫全書

經部
周禮翼傳卷一

詳校官監察御史臣徐如澍

刑部郎中臣許兆椿覆勘

總校官知縣臣楊懋珩

校對官編修臣莊通敏

謄錄監生臣莊鮑驄

周禮翼傳序

五官全經敬為傳詁冬官放失衆說紛紜則天明稽古

訓述冬官補義

昊天懸象皇王布政若合符節中古文盛厥象益彰仰

觀俯察述天王會通

夫子沒微言絕處士橫議大義乖提挈網維開示蘊奧

述學周禮法

壘高者下為基生民者地為本量界雖廢方畧其存通

變宜民存乎其人述治地事宜

軍興行司馬職掌俄空東漢罷都肆而古陳晦衛公變
七軍而八陣亡本風后推尚父述握機經傳

盈頷吞者不知易牙之味一指障者不見太山之形鹵
莽自賢敢于非聖毫分縷析述非周禮辨

書名不諭于象胥古文大壞于斯篆至以楷翻經并斯
篆失之酌古準今述經傳正譌

冬官補義

冬者萬物之所終也司空掌邦土天下之治所由以成故命名曰冬漢人以攷工記補之夫共工者誠冬官之事但其一屬耳故取之以入冬官則可遂用之以補冬官則不可自宋以來乃以五官之事聯職于司空者歸之以為冬官未嘗亡也不知周禮之治每事六官皆與蓋自王身王宮王朝王畿四海以及于昆蟲草木六官皆有其責非若後世之設官截然各為一事也不得此

意遂用其疑似以相歸并此說一與人各自以其意見而更定之乃此人之周禮豈復得為周公之周禮哉愚謂周公設官皆取法于天五官厯厯可考此見聖人之制作後天而奉天時建諸天地而不悖也故以天象之有關於冬官者而參互之即炳然不磨其餘各職見于經傳者亦昭然可攷謹述之如左補其義則前人是非不辨自明闕其文以追續經之罪乎損益而折衷之姑俟後之君子

天王會通序

天者萬物之祖懸象著明不言而品類畢陳王者天之
元子法天立道無為而天象益彰有見于天者則曰虛
能生有故在天成象在地成形有見于人者則曰影生
于形故下有是形則上有是影孰知有則俱有成不獨
成曷先曷後耶是故元氣之開也以漸後人或以人事
而名象周鼎靈臺天祿王良之類人文之著也以時後
王多因天象以設官三垣八政營室東井之類後易曰
天象未開時先有此事王見有此星然後設此官

欽定四庫全書

周禮翼傳

先天而天弗違後天而奉天時斯其至矣聞其名可以
了其義觀其位可以測其蘊自昔聖神未有不與于此
文者也中古道亨文盛周公得備施于六官春秋道否
文弊孔子不復見于空言秦漢而下業儒者視天象為
術家而知焉者寡言天者以王道為粗迹而罔焉弗聞
直以占驗轉相註釋大義乖而小道熾徒使英雄假之
以用武姦豪竊之以行私宜乎為世大禁而垂象之精
蘊隱法天之妙用絕矣夫前世已然之迹未必一一復

見于後世殆可參攷而不可為典要者也今以占而定其所主或數星而同一主管或一星而淆以數占是皆不明乎道幾何而不致遠則泥也哉且今之言天者咸以二十八宿為綱不知二十八宿皆當七政經由之常道而猶顯著故古之步天者因用以七政之行而天王合一之妙則未盡于此也粵嘗仰而觀之帝一也垣斗角心義各有在相一也公孤輔相職各有司后妃太子諸侯諸臣間見而有無窮之奧八政六府錯出而有

天然之蘊大而日月嶽瀆微而昆虫草木精英呈露至
理攸存煥乎圖書布列之象多不可損少不可增昭乎
帝王經綸之法南不可北左不可右更以三五之所陳
稽類體躬則有以見夫六藝之指歸頡頏相並萬化之
綱維昭晰不遺誠王道之權輿列聖之取衷焉者也君
人者明此則對時育物不假強為人臣者稽此則補衆
陳善非為虛言學者而不知此義則無以奉天體道實
有諸己予病夫王道之失其原天人之二其本也述會

通以明之言王道與天文通貫只一事也為星一千四百六十五為座二百八十三其大義數十其文五千字宙間事如指諸掌列宿所主截然不移彼專門者測而識之因其體之聚拆隱見光之微明變動與夫七政之所以宿離客氣之所以乘見而又參之以十有二歲之相伍之以十有二律之徵紀之以十有二州之舍吉凶妖祥可觸類而推之是則有司存矣拒而不信非予之所強也知而弗庸非予之所望也合而凝之存乎德推

而行之存乎通神而明之存乎聖人焉

學周禮法

夫子嘗示人以學詩之方矣今之學詩者有能達于政而專對者哉有可以興可以羣可以觀可以怨與能事父事君者哉又有能不正牆面而立者哉蓋夫子之所謂誦者非徒記其詞也所謂學者非徒知其義也亦為之而已矣世之學周禮者多矣剽竊其詞以為舉業一時之用何暇于深思其義討論其義以成訓詁一家之言何嘗有必為之志其與夫子之所謂學者異矣安望

其此禮之行乎愚非有以過夫人也但其志直欲為之有所不得虛以待之此理自然呈露其與鑽研紙上強探力索者為少異耳嗚呼聖凡識異為己為人道殊以不肖而述周公之作未知果能涉其藩籬與否也以後人而覽予所述安知遂能窺見其室家否乎雖然學之弗能弗措則思之弗得弗措豈直見愚之室家耶將希周公堂室矣學詩學禮何以異諸

治地事宜

愚嘗攷自古井田之說而為之溝洫丘邑封疆等圖蓋欲知其大較不得不然耳山林川澤回曲萬狀不可拘一也地有肥瘠司徒言上地中地地下地參差不齊二也宅田士田賈田圭田餘夫田所受不盡田之數三也地形偏斜不等不及百畝者甚多四也山川林澤固在除去之外一易再易者一夫耕二夫三夫之地圭田則以一井中公田而為二餘夫則以一夫之田而為四士田

賈田等各隨分量授之如餘夫法若其地形偏斜不足者則會筭以足百畝之數蓋無窒礙不可行亦何嘗取正方如紙上所畫哉孟子曰此其大畧也若夫潤澤之則在君與子斯言得之矣但其法始于黃帝暨于大禹伯益后稷皆以神明之德相與參畫輔相始克成功又歷殷周數聖人而後大備今廢棄殆盡若欲急遽起事竊古人之糟粕而行之必大致紛紜徒敗壞天下使後人指為口實而已聞之劉中丞隅穆翰林孔暉開地于

北直隸河南稍獲其利今南方土瘠民稠之處往往散而之四方耕種工作以謀生每負冒藉越境之罪苟有志興復宜進天下之賢擇其策之可用者授以荒頓之地隸以客徙之民或免罪賜爵以勸之室廬牛種以安之如鼂錯徙民之法任其經畧開墾無拘以文法吏治數年之間優劣自見然後興其賢能者使之循行勞來用其良法美意推而廣之事有成效則人必樂從非虛言徒法之比矣因述事宜如左

欽定四庫全書

治地事宜

--	--	--	--	--	--	--	--	--

握機經傳序

古者佳兵無所庸言也談兵也者不得已焉也治古之時人閑射御軍有成法有寇戎之事則百姓皆兵六卿皆將文武未分見之無不知行之為常事焉耳不明也斯有言不行也斯有傳故兵之入於言者非得已也夫殺則不仁爭則無禮詐則非信其非大道之行歟何則天造草昧龍鬪于野真偽相角六合一家四夷入寇盜賊竊發何世無之猶之毒蟲猛獸數澤山林是其區也

則縱之在平原則將剝我樹畜寧免驅逐之乎在蕭牆之內則將戕我骨肉寧免與之鬪乎故夫虞衡之有獲寔居室之有藩牆皆兵之道也故知而不為則可欲為而無其具胡以救慮備而不用則可欲用而無其備胡以立國且兵法曰形人而我無形多方以誤之者疑之也疑之也者密之也示之以利云者誘之也誘之也者餌之也故投其欲而非詐也不顯吾計而非不信也順刃者生僚刃者死殺人之中而有禮焉而非爭也故兵

者仁人之所不忍言也而不得而言信士之所不肯為也而不得不為義者之所當為也而不極其力知者之所優為也而不任其詐必五常之德備而後可以言兵也故夫分數不明則無所統攝而人各其心左右不相顧首尾不相應可離而易潰于是隊伍之法生焉布列無法是使士卒自占其地隊伍必紛亂而不整家自為敵敵因可乘于是行陣之法生焉擊刺無節是極士卒之力而不虞其罷怯者敵勇者不立于是有坐作進退

之法焉調發無序是擁衆而無竒正也戰者獨勞居者
虛壘故有出兵次第焉處舍不周徒舉不當是知存不
知亡棄吾民于敵也故有營壘軍行之制焉教道不明
則鼓之不進金之不退器雖利而不殺兵雖衆而無用
是以有教閱之法焉故以兵為是而喜談之者非也以
兵為難而不敢言者亦非也或者謂吾有是陣法彼亦
用之胡以相決是大不然便捷輕佻而不能備物倏聚
倏散而不能持久勝不相讓敗不相救而無節制皆未

世盜賊之常耳彼雖得之必不能用若相敵者更有德義輔之所以為必勝之道也世所傳孫吳等書皆言兵之權畧也若營陣之制莫逃風后之所作三代保邦莫之能外操御天命輯寧外侮保護黎元所宜世守但明者變通以愚民昧者支離以自眩真妄雜陳使聖賢簡明之心法反為繁晦之刺語後世莫所取裁予因作傳以明之復推廣其所未言者俾可以措諸行事雖然予所傳者法也通其意則法神不通其意法不行也昔高

帝得淮陰而申明之以開漢業大宗得衛公而變通之
以肇唐基昭烈得武侯而敷演之猶能吹炎漢之餘燼
使之復然唐之明皇以忘戰而不用終于播遷宋之諸
君以小知揣摩卒以削弱非睿知神武切于救世者可
以語此哉

非周禮辨

聖王治法自大德而川流不俟更改而後定其禮經自神化而模寫非有思勉而後成欲窮之者如登太華即之而愈峻如涉滄溟測之而愈深故先儒讀經無疑至有疑有疑至無疑思而不得鬼神將通之然後為庶幾乎耳豈若史書集文粗畧淺近一覽而盡得其旨義乎非周禮者若林孝存何休輩不下數家指擿瑕釁無如胡仁仲之詳著書數十萬言辨析精微無如李明德之苦

移易周禮者若吳幼清余壽翁王次點輩亦不下數家
參互演繹集成後出莫如舒國裳之備以愚觀之胡氏
謂太宰六十屬無一官完善者其說淺陋未見有的然
不可破才高之人乍見而不領略遂置不復思任意剖
決雖欲自絕于經何損哉舒氏作序辨圖釋剔偽繼之
定本夫先王之法本安也而人自不安聖人之書本明
也而人自不明各以其意為之更定初若快意以語
不知者似乎可觀回視作者精義其謬何啻千里季氏

大旨唯執孟子一書以為權度然愚觀孟子之才足以
旋轉乾坤開闢宇宙其學識其大者使其當路則其施
為必不泥于周家之舊章且其所以告時君者在于救
時三揖三讓之儀非所以施于同室之鬪不親授受之
禮不可以語于兄嫂之溺故遠色賤貨下力放淫皆孔
氏家法也好貨好色好勇于王何有今樂猶古樂可執
之以非中庸論語乎况周禮行于王國而非侯國之所
通行其藉藏于六官孟子未嘗適周固不得而見其行

于侯國者則諸侯惡其害己而去其籍至于姜之齊移而為田姬之晉移而為魏舊法豈有存者立意既偏將後人誤解者皆以病周禮治經而可草率若是耶愚既取三家之說為之辨釋因述其所以差失之故冠于篇首覽者自知所擇云

經傳正譌題詞

詩汚水民之訛言說文作譌言為乃獸名即猴也其性變詐故用為差譌之意

訛字說文缺詩無羊或寢或訛獸活動也節南山式訛爾心改易也書平秩南訛物化生也不當用為差譌字

余觀說文所引五經字與今書文絕異蓋許氏當東漢時猶及見古文故所載如此今之經文不知幾更翻楷之手故與許氏不同也夫余所病于說文者以其悖于古文也而翻楷者又悖于說文則其去古文奚翅千里余嘗語楷書之非世罕有知者至語說文之非益不信之矣今舉說文所載則翻楷之非亦自易見然則說文

之非豈無徵者哉世之習經者惟知有今文而書字者
惟知趨簡便狂瀾一決謬將何極今姑據說文所載及
淺近詭謬之甚者稍加訂正以為之防膚淺衰病非其
所長也不賢者識其小者亦非所重也不得已焉耳且
此特因字書中見諸經字聊正之而已苟據諸經文一
一是正之何止于是姑為之發端云

欽定四庫全書

周禮翼傳卷一

明 王應電 撰

冬官司空補義

空之為言空也相天下之大勢擇其空缺之處而脩治
補助之故天文室壁之末有土司空一星土公二星主
知水土殃咎周官之職曰司空掌邦土居四民時地利
記曰司空度地居民使地邑居民必參相得無曠土無

遊民司空之職莫大于此蓋司徒掌其圖數而司空治其功程司空建其始而司徒守其成此其聯事若此而後人遂欲以相併也然則冬官之屬當有掌大均之事如地官之徙民宗伯之恤衆又當有善于景相觀卜以經營疆理于四方如詩稱召伯之世執其功燕師所成者

百工之事惟土木為大故蓋屋二星土公吏二星列象于營室之下又百工居肆以成其事故土司空四星列

象于翼軫器府之下以冬官而言當有工師以統營造
諸工又當有梓人以統制器百工是即攷工記之事虞
書所謂共工也

百工之事其用邦財為甚廣若攷工記廬人為兵器梓
人為樂器其屬甚衆故呈象于天有器府實九府之一
也後之言九府圜澁者不見此義遂以天府職內當之
殊不知天府掌國寶邦典而非用物職內主監臨而非
主守且職內與職歲合職聯事何得專以職內為一府

故以司空而言當有器府與九府相通觀巾車云毀折入齎于職幣職金云入其金錫于為兵器之府則巾車器府與九府園灋相通可見故所謂九府者太府內府外府玉府器府與司徒之泉府春官之巾車司寇之職金幣餘之職幣合而為九斯百貨可以流通矣

天之井宿主水衡事也故其附星若南北河四瀆主大水也水位水府主溝洫小水也其他羅堰九坎天津天潢天江天河不一而足于五行屬冬攷工記言水甚略

地官雖有川衡澤虞但主厲禁財賦昔伯禹作司空曰
予決九川距四海濬畎澮距川然則四瀆皆當有專職
又當有匠人以治溝洫通津梁如攷工記所述匠人之
法斯無後世水患矣

大田之禮曰春耨夏苗秋獮冬狩于冬獨曰大閱軍禮
為備而三時皆取準焉故天文壘壁陣見于陬訾之次
冬官當有壘壁氏掌大閱之禮蓋其法統于司馬其民
出于司徒而其事則掌于司空也

天子巡守之禮春夏南秋西冬北而一終故天官河
鼓閭道等星見于玄枵之次冬官當有屬以掌夫巡守
之禮凡道路津梁之通塞山川之險易與諸侯所朝之
方所述之職皆其所司也 已上凡八職皆出自天文
有天然之妙非可以私知安排也

萬物終於冬故冬官之職曰任百官生百物以萬物之
所終也冬官之典曰事以萬事之告成功也是故伯禹
作司空六府三事允治故曰考功謂政百官之功也今

之攷工名存而實亡矣司空當有屬總脩六府之職歲終則佐冢宰考課之事此司空典職之大者也

人心不節則無限制富者欲過貧者欲及百工不節則競為淫巧蕩上心而滋人欲靡有紀極書立政有準人守法有司也孟子謂工不信度以準人之職廢耳故冬官當有準人一屬則律度量衡各有其則宮室器用各有其制淫巧奢麗何自而興非不節自正之道乎與春官典命夏官量人分職聯事之官也

冬主藏天地閉塞又于時沍寒民當閉藏禮有嗇夫當屬之冬官主掩閉室廬收藏積聚務為封守鍵閉之事若月令冬月所記者所以助天地之藏也

自古大史主掌國史今春官大史所載但曰正歲年以叙事是乃羲和歷象授時之職古稱左右史而老聃為周柱下史于天文為柱史今五官皆無其人蓋冬主事故記事自宜屬冬故冬官當有左史書言右史書動與內史之策命而總屬諸柱下史大事別記當如書冊書

紀年當如春秋專掌文學記載之事蓋大史則為考時
執禮贊治之職御史則為守法之宗三官實相表裏故
同以史稱也 己上考工準人嗇夫左史右史五官其
名著于書禮其事見于傳記如揭日星為周禮者自習
焉而不察耳

舊君傳位新君踐祚三年諒闇天下莫大之政也傳位
踐祚見于顧命諒闇見于各經今雖以聯事見于各職
而未有專官死人之終事天道北為幽陰故北方虛危

為死器之事冬官當有是官以掌其禮

水於五行屬冬雖潤于上而實盛于下故月令仲冬祀四海水泉魚于動物屬潛月令季冬命漁師始漁鹽水所自出而其利為甚博天官鹽人但掌國家食鹽耳出鹽之地未有其官故水泉魚鹽三者皆當有專掌之官而屬之司空魚鹽兼出於江海而專掌于此者亦猶職金之掌于秋也

豕人以供豕豕水畜也故屬之冬官

天王會通

中垣紫微天子之大內也上垣大微三朝也下垣天市
市也兼國中矣凡建國中為王宮前朝而後市蓋本
諸三垣也故大帝后太子庶子皆列象紫微總居大

內也

凡帝星見處最多蓋中垣者常居上垣聽政下垣治國角主正月新政心主見於天根北極日

太陽其德天皇天乙太乙其神北斗臨御之柄各不同也后星所見亦然中宮者常居尾生生之源軒轅立政之地天市內政之所布月太陰后之德各有所指也

天樞北極所謂北辰居

其所而衆星拱之天子為天下樞而無為之象也五

帝座即五小寢退朝宴息之處華蓋承雨日之器覆於上勾陳天子親軍護於前也兩垣宿衛周廬宮伯

所掌八次八舍舊立將相等名非也

天子之武備國家莫重之務周

禮學於宮伯宮正官府士庶子皆統之故中宮者衛士常居也常隨則為勾陳天棓侍朝則為虎賁郎位在東宮則為騎官騎將守國則為梗河招搖也天皇在勾陳裏天明則日月

不明王者聰明睿知而不用其明故冕旒蔽目絰纁塞耳主隱占以見變也天乙主司戰鬪吉凶太乙主知水旱疾疫皆天帝之神至誠如神所以首出庶物

也大理主平刑獄陰德主施恩赦君德以仁為主也
尚書出納王命王之喉舌虞之納言周之內史大僕
之職司也柱史左右史也四輔蓋即虞書四鄰在周
則師氏保氏乃王者之友臣也六甲主布政敬授民
時大史正歲年以序事者天柱主晦朔晝夜以知天
文之次序馮相氏會天位叙四時也

世之言天者二
家曰推步曰占

驗推步主測度推算在內之事故中宮天柱主推步
六甲所以授時占驗必登高遠眺在外之事故上垣
則有靈臺下垣則有漸臺畢主邊兵尤當觀天文氣
候故有天高若夫憲天以贊化育則六經無非是道

言天者固不及知而
儒者亦所罕言耳

御女女御之象女史佐后禮事

而記其美惡者也北斗主出號令定紀綱運旋中央

臨制四方建四時均五行七政之樞機陰陽之本源

也有君道焉勢臨御之柄惟辟作威作福所謂八柄

御羣臣也然夫履則厲故不欲其明古者或有宦者

竊柄而威福恣行以致明大占書遂謂明則刑餘用

事實非斟者主星也輔一星大臣象也

斗有三南斗
見于析木之

次一見於天市垣斗主斟酌損益故北斗為酌量元
氣南斗主進退人才天市中者量米穀之器而已

三公論道經邦燮理陰陽三師疑作三孤貳公弘化

寅亮天地者也

大臣宰相之職非一公孤師而不臣四輔友而不任相天官冢宰大將軍

夏官大司馬司空冬官大司空尚書主納言上垣三公九卿主常朝下垣七公主治國輔台鼎蓋其總象

河月蓋其總占若軒轅內平天相乃文昌位于斗之內宰此二官皆主佐后非相職也

上欲明天理居于斗之中欲暗王者代天理物已何

與焉文命敷于四海法文昌也神武而不殺則天理

也舊文昌六星各有所司有上將次將貴相司祿司

中司命等名周禮註引此為証然北辰居中列宿咸

以為準其為司中無疑虛宿下自有司祿司命故知
星家註釋之謬太陽守乾之德也昊天象與昴宿
太陰坤德地祇之象相配守字衍又太陽主人君以
剛健御極太陰主以厚德載物亦后之象也君德以
剛為主玄戈天帝用以斷天鉞所執以威四方伐無
道天棊前驅以禦難也天牢貴人之牢有八議焉故
以不見為善也內階升降之納陞天鈎與服法駕天
厨內厨掌天子及后饌食於周籩膳夫之內饗及饌

人天床及天市垣之女床天子及后枕席牀第之司
于周禮則天府之所掌也八穀黍稷稻粱麻麥菽苽
也舊解為大麥小麥赤豆大豆止當菽麥二穀耳扶
筐后妃親蠶之器也農桑衣食之源民之所天人君
當知其艱難列於此者帝親耕后親蠶為天下先之
象也傳舍主北狄驛館故不明則胡兵入也

經音
主曠馮

音平倍弼浪反兵
器也饒昌又反

太微兩垣十星其中間者天子之九門曰大陰大陽中

華東西華左右掖門端門也五帝座天子日出眡朝

之處天子儲嗣監國者故列位焉

北極前星主天子居大內底為東宮

所生之地也

幸臣天子褻近之臣若周禮小臣御僕之屬

可以當之古者天子侍御僕從罔非正人豈有所謂幸臣乎然則斯名也其變于後代歟虎賁從官郎位郎將即司士所掌王族故士虎士太僕大右大僕從者等官也三公九卿常朝者五諸侯入覲者也謁者即所謂司士擯孤卿特揖者內屏設于路門諸侯入

自應門則天子宁立其前也天子外屏諸侯內屏此亦云內者對婁宿外屏言也常陳儀衛之仗也鼎國之神器台國之高位皆大臣象也三台解者不一要之主臣位上公侯中卿伯下子大夫歟太尊天子之尊屬貴戚也少微賢人在下僚者亦東宮官屬也明堂天子布政之宮靈臺所以時登眺望雲物宣壅蔽而舒鬱滯者也長垣設險以守其國在古為城郭溝

涂今為長城是也

宁承呂反
涂塗通

天市兩垣二十二星主四海之地建侯樹屏蕃衛王畿

也垣中侯星畿內諸侯

上垣五諸侯八覲在朝者并宿五諸侯六諸王建萬國以

養民為務河鼓之下十二國天子巡守之所至也

帝座天子親治其畿內篤

近舉遠之象市樓司市所蒞之思次也斗斛帛度實

人所以同度量而一淳制也列肆肆長所以陳肆辨

物而平市也車肆貿易車之處

軫所以造車閣道下車府天子五輅所藏

氏下天輻士大天之車歟夫兵凶器也欲求萬全卒不如騎騎不如車故聖人為車制與經界相表裏實制寇敵限戎馬之精意也仰觀乾象所麗特詳欲禦外侮可不修舉其法哉

屠

肆飲食莫貴于屠故專其肆也天子之親同姓皆食采于王畿故宗星列位焉宗正所以叙玉牒正宗法宗人即都宗人家宗人治其禮事者也侯星則諸臣采地視諸侯也女牀后妃之寢也后聽天下之內治故太微皆天子之事天市多后之事女牀麗于此者天下奢儉貧富之原國母吉凶之候也宦者四星即周禮內小臣之職其員四人取象于此也天紀市之法也凡建國內宰佐后立市設其次置其叙正其肆

陳其貨賄一其淳制故斗斛帛度凡司市之法亦內
宰所掌而后得以與聞者也織女即周禮典婦功后
妃夫人無不勤于絲麻也七公鄉老鄉大夫佐天子
以治王畿者也市之中姦人聚焉故戮人必于市貫

索者賤人之牢也

天牢見紫微垣與此貫索貴賤所司不同故禮公族有罪則磔于甸

人不與國人慮兄弟昂主天下刑獄大司寇之職見于正秋之位故大辟必于秋後處決也

罰主

金贖罪利者人所同欲而易犯故罪之輕者則罰贖
所以禁之于微又國君過市則刑人赦夫人世子命

夫命婦過市則罰幕布蓋帷戒君子不可以近利也
梗河招搖皆主戈矛鋒刃以備不虞也漸臺主晷漏
律呂吹灰之事以驗氣之應否緩急并觀于乾象以

占天文之變動保章氏之職也

晷音舉

角蒼龍之首鳥獸生角草木柝甲化生萬物者也大角
君象主春王正月新政攝提協時月也進賢興賢能
也天門陽門南門天地于是而闢戶人君于是闢四
門也天田耕藉也亢主章奏明目達聰周禮之復逆

也廟堂通塞之候故曰疏廟頡頏赦過宥罪折威禁
兵止武平星平和政刑皆春生之象也帝席宴樂羣
臣嘉賓也亢池平道達水陸之道也庫樓天府大府
等在庫門之內者也樓中衡星闕后和鈞王府則有

也

亢古吭字取蒼龍吭意亦音岡頡頏反頡音杭

氏天之行始于東故此為天根天子為天下根本故取
象也大乳后妃不自乳其子乳母也亦主飴饋之事
騎官主國有大事天子合國子而用之者也陣車兵

車也車騎乘車之馬也騎陣將所以帥國子者也天
輻車之三十輻也古之命將者賜弓矢則王畿之外
皆得專征賜鈇鉞則參將而下皆得專殺然則大將
統兵于外無乃非國家所利乎周禮國有大事則國
子皆屬于天子唯所用之治以軍法司馬弗與故大
將統兵權于外以正軍法而天子握兵柄于內以遏
亂源氏宿之下而有騎官騎陣將天道明切如此氏

禮反根柢意也
飴音兮糖也

房天子之后寢御羣陰之處鍵閉鈎鈐其管籥兩咸防
淫泆之戶皆所以謹內外之辨也日大陽之精生于
東故麗于此月生于西故麗于昴日君象月女后大
臣象也心天子之象蓋人者天地之心而天子者人
之主故以為名也從官巫鑿之屬主疾病禱祠之事
積卒衛士即宮人所掌六寢之脩掃除糞洒之事也
尾主后妃御叙于王所神宮解衣之內室傳說后宮
女巫主克禋克嗣以弗無子也箕者主承糞穢又為

播揚五穀之器字書女執帚為婦周禮春枕昏掌于
女奚尾而受之以箕可以知婦無外事矣木杵主春
而糠者穀皮也東方主風此星播揚故主八風傳所
謂箕星好風是矣舌哆又主口舌詩云哆兮侈兮成
是南箕東方者春產萬物者也故太子謂之東宮天
子后妃之寢麗于此者嗣續無窮之意又主太子問
安視膳以孝養其親也天江者大江之精發源岷山
江淮者淮河之精發源桐栢並注諸東南大海者也

江淮河沂為四瀆天河見于昴宿下泚水絕流故天文亦不見井宿復有四瀆者以天下所資以為養也

東南水之委魚鱉及龜水族也故附麗焉

鈐咸弗鉗
織絞通挑

昔涇治米也哆昌者反
張也岷音氏泚音濟

斗宗廟酌酒器也爵人必于廟故主薦賢良而受爵祿
斗為器量所以斟酌之也掌于司尊彝天弁天子之
弁冠掌于弁師建天之都闕正月之吉和布法象于
其上者也天籙主國家秘書藏之金櫃石室若大訓
河圖大盟約開籙見書之類皆天府之所職也此皆

春官宗伯之事故列象于丑寅之間也

河鼓天子之路鼓天桴所以擊鼓亦主漏刻鼓鑿之事
左旗右旗天子之大常皆天子巡行之所有事者也
天下之務莫重于耕織牛農丈人所耕之具驪珠女
所獻之工離瑜女之服飾也天田九星井田之象敗
瓜瓠瓜疆場有瓜瓠乾則質堅敗瓜者西甜王生冬
等瓜時過則敗故名菜類之大者故占菜之豐凶狗
天鷄民間常畜制其田里教之樹畜也羅堰主豬畜

九坎主溝渠天淵是其泉亦所以灌溉也十二國天下之諸侯也此皆巡守于天下之事十二月朔巡守而一終矣三垣皆天子在國之事非巡守則四海之大不無壅閉之處故舜五載一巡守周制十有二歲王乃時巡後世此禮既廢凡天子出巡之地至等于兵災仰觀乾象所謹在道路津梁所嚴在旗鼓車御所重在人民溝洫樹畜代天子民天下其家也不當若是耶善乎漢章帝之詔曰車駕行秋稼觀收穫皆

精騎輕行無他輜重不得輒脩道橋遠離城郭遣吏

逢迎刺探起居出入前後以為煩擾動務節省但患

不得脫粟瓢飲耳可謂暗合天道者矣狗國朝鮮獫

狁之屬也

四夷雖人類而其性之異于禽獸者幾希以其得天地之偏氣也觀上天呈象若虛

下之天壘城生北狄軫下之東甌青丘子主閭蠻畢下九州珠口為傳驛之官皆在天之涯聖人謹華夷

之辨有以也夫又按天子有道守在四夷德之下衰乃有戎狄之患且內有郎衛兵衛外有梗河招搖長

垣天象設險深切著明如此何外患之敢干明皇自我致戎棄社稷而逃遂為後世不死守之魁彼愚儒

反或是之悲夫 獫狁音險允杼 枹通鑿音戚夜戒鼓也場音易

天之道南為陽明北為幽陰人之事嘉禮屬陽凶器屬陰故坐必南向寢必東首葬則于北方北首皆天理合如此也故北方玄武為虛危皆主死器危禍等事命主年壽祿司官祿危司驕泆非司過失謹慎則享祿壽危非則懼凶夭也哭泣主倚廬哭泣之事敗曰主敗亡災咎曰咎聲同通用也墳墓墓大夫所掌百族兆域虛梁冢人所掌公墓之地園陵寢廟也人萬民之精也正北方子位于先天卦氣為復貞下起元

天道之所開人之事雖生于寅而實胎于子故懸象于此繼天而生也周禮獻民數而祭天之司民蓋即此星註疏以為軒轅角非也天錢主錢帛十星規圓主九府循環流通以權百貨之象坤北陰方故主利也

洪範八政曰食貨祀司空司徒司寇賓師天象八穀瓜柳主食天市軍市天錢主貨鬼主祭祀營室翼軫司空之事七公司徒之官凡刑皆司寇凡兵將即師謁者傳舍主賓客聖經與天道相合類如此

天壘城主丁零匈奴諸夷正北方之地也

室十月而農工已畢此星昏而正中故主營建宮室定

之方中作于楚宮是矣離宮三雙天子之別館也百
工之事惟土木為大土司空冬官主知水土殃咎掌
度地居民相景之職土公執役之民也蓋屋主營建
宮室工師之事土公吏其屬也杵曰冬月治五穀之
所有事也

定音訂景
古影通

閣道天子遊幸別宮之道故從紫微宮絕漢抵營室附
路閣道之便路王良造父皆御官王良前四星為天
駟舊以房星為天駟以其星于仲夏初昏正當午位

而乾為馬得午之氣也策王良所執以御也車府天子五輅所藏掌于中車天廡所以養馬掌于校人者也天津四瀆津梁輦道天子馳道所以渡神通四方主巡行天下水陸之道也奚仲主軍征大御之官也至尊行幸道路舟車猶加謹嚴故天道詳焉螭蛇北方水虫也

壘壁陣天子四時之田以講武事者而於冬則備軍禮以大閱故繫于此羽林軍鄉遂之兵猶後世京軍也

北落門即大司馬仲冬教大閱所謂以旌為左右和門以叙和出軍令貴一師克在和也鈇鉞者軍中之所有事八魁主設機穽羅網在周官為獸人迹人羅氏等官也雷電霹靂雲雨所以發生萬物者也非和皆于此候之王者之師如雷之動如電之明如霹靂之威如雲雨之澤其鼓舞羣動神武如之也天網武帳也與八魁義同天海四海之精也

壁天下圖書之秘府自室至婁天子之宮館苑囿在焉

所以禮賓講武遊觀之所皆不可缺而亦不可溺者
也有壁在焉所以崇文德天象不既昭昭矣乎

奎天子之武庫軍南門軍門也天大將軍大司馬之官

本兵之職外小柱為庾士左右為旗也

古者兵農不分六卿皆將

後世兵益重而始專其職大將軍即大司馬壘壁陣
今之團營參有左右前後中五軍命將出師之象畢
為邊兵騎陣將所以帥
國子不領于司馬者也

婁主苑園犧牲以給郊祀周官之牧人左更藪澤之虞
官右更牧地之牧師天陵主山陵丘陵虞人之所有

事又盜賊所依死亡所瘞也故兵疫于此占之積尸

陵中之尸也隱暗為吉

五岳者五方之鎮風氣之所限隔水澤之所發源民物之

所依歸者也其神視四瀆為尊而不見于天者蓋山靜而無為水動物也脩舉則利搏廢墜則害溥故聖王經水之政為多猶醫之治血而不治骨也宜星象之獨畧歟

天濶豢豕之所外屏

所以蔽臭穢天苑主養鳥獸天園主毓草木周官之

圉人場人也鑊鎖主芟芻剉橐以飼牛馬芻橐營聚

芻之所皆委人之職萬物成于秋故于此為備也

胃天之儲藏五穀之府所以會計邦用者也天廩天子

之御廩以給粢盛也天困田中貯所納之穗也天倉
掌粟入之藏以待邦用周官之倉人也天庾貯于民
間小倉所謂曾孫之庾如坻如京也時至于秋則黍
稷重糝禾麻菽麥靡不畢登矣

會教外反困坤
倫反糝音六

昴主刑獄天之道秋為殺地之道西為金皆所以裁物
之過也人之事蠻夷狡夏寇賊姦宄者則正之小則
加以刑大則加以兵故兵刑皆列象西方也又名菟
頭主胡星以其稟肅殺之氣也昔五胡時專以此候

禍福而三垣皆不應可以知華夷之辨矣况為口舌
卷舌六星讒佞之臣天讒一星主讒佞者自古佞臣
無世無之在人君近遠之何如耳天河一星濁河之
精發源崑崙之象天船主舟楫船中積水一星所以

候水災也

昂與留同音
讀作卯非

畢主邊兵禦侮之臣附耳主聽得失伺愆不邪不祥天
高主望雲物觀邊警也天街主南華北狄之道所以
限隔華夷天關主邊防關塞亦皆日月之所行也五

車軍器兵車所貯故以柱之出入車內外知兵之出入礪石磨礪鋒刃天潢輿梁可通車輿者咸池主陂澤池沼鳥獸麟介之所萃川師所謂辨其利害者也天節使臣所持以傳命掌于掌節九旂大將所持以發蹤者也掌于司常九州珠口主傳譯象胥之屬也參中三星為中軍正中一星大將旁二星參謀也命名為參以此二肩為左右將軍二足為前後將軍伐大將之柄主大司馬九伐之法以正邦國者也備行軍

之藏府坐旗天子大白旗參旗大將之旂也司恠主
候災祥軍中望氣司卜者也玉井主水泉給厨用軍
井行軍之井所以給師徒也軍市行軍之市野鷄精
主知物價察姦慝賈師也闕丘天子雙闕丘下一狼
主相侵盜賊也弧天弓也常屬矢擬射于狼天狗橫
河中皆所以備盜賊也屏所以蔽廁下一星天屎
也甯子委反又音資
鳥喙也參清舍反

井主水衡法命中平之事物之平者莫如水故營國制

城畫野分州皆取象焉鉞附于井所以斷也北河為
北戒曰胡門陰戶自壺口北負微垣東抵獫狁朝鮮
以為北紀為陰國主攻伐之政南河為南戒曰越門
陽戶自弘農並谷絕江河達嶺循漳東抵越雋東甌
以為南紀為陽國主禮樂之政即地里南北絡之說
見天官書六諸王宗臣藩屏王室在周為魯衛之國漢已
後則為侯王也五諸侯畿外諸侯也此皆聖王所以
建國而養民者也天樽主盛饘粥以給貧餒水位主

水衡水府主隄防溝洫之事四瀆江河淮濟之精也

六府之中水居其先王政之所至重也故周禮川則有衡澤則有虞溝洫則有匠人故凡麗于天者若四瀆咸池之類皆虞衡之所職水府羅堰九坎天淵之類匠人之所職歟 丈人主壽考而

哀孤窮孫子主孝愛以侍丈人老人所以占大人壽

考者也

穢音機 尙字充反

鬼主祀事祖考之象中央積尸所以象神也天廟天子

之祖廟天社勾龍之神天稷后稷之神也積水積薪

主水火之齊以給烹飪燿位主變國火供明水火及

烽燧司燿司烜也

禹叙六府曰水火金木土穀天象燿位司火柳主木土司空土公土

公吏司土八殺主稼穡于水猶詳而金獨畧可以知天道重輕王政緩急矣

後天卦位西

南坤方萬物皆致養焉故曰致役乎坤潤萬物者莫潤乎水故又曰井養而不窮也井宿列于西南致養之義也養莫大于敬老恤孤祭祀者追養繼孝之事也

柳主草木雷雨時至于夏雲行雨施品物流形也又為天之厨宰主享燕之事陽氣極盛故天子飲酎于是

時也酒祭祀燕享酒正之官天記主知禽獸齒歲牧人牧師等職也外厨主烹宰給賓客外饗彙人之職

也耐音紂

星為朱雀頸文明之會羽儀之所蓋物盛則有文故主衣裳文繡也

軒轅南大星女后左右為夫人以次而北者嬪御自午而一陰生陰陽相遇故此為后妃之宮庭軒轅曰權太微曰衡主內政以弼太微者也內平主執法平罪

天相主朝服之制佐后禮事並內宰之職也

張主珍寶宗廟服用掌次之官翼天子之樂府也樂陽氣之盛故繫于此天子所以大合樂于夏也

軫主車騎任載軍之出入皆占之長沙子主三軍壽命軍門天子之軍門也器府百工居肆以成其事者司

空掌邦土翼軫器府皆其所掌故土司空係焉百工之事當及溫和之候故月令季春而百工咸理孟冬

而效工翼軫所以麗于辰巳歟

工有大小不同室下司空主工師匠氏土

木大役若此之司空東甌主穿骨南越諸夷青丘子
祥人與人之事而已
南蠻之國也

學周禮法

周公設官分職皆出自天備見于天王會通冬官補
義學禮者非與天為體安得有聖人心習彼以章句
訓詁為能窮遺經以儀章度數為能盡儒術何足語
此况于掇拾記憶以作文乎

或曰三百六十官皆周公心思所為何其精密也是

不然天生蒸民有物有則必如此乃安不如此不得
公之制作皆自廣大中流出物各付物正如天地之
化冲漠無朕及其氣機鼓動大而日星之垂教河嶽
之致靈皆至理所寓微而草木之一華一葉昆虫之
一羽一毛靡不相對成文豈物物刻而雕之哉自有
莫之為而為者周禮非致思所與亦若是而已矣
周禮六官之設曰天地春夏秋冬掌治教禮政刑事
上下四方包括不漏以成天下之治正如天地四方

之六合一方缺即不成合其分而治之如六鄉六遂
六軍小者如六牲正如六出之花一瓣脫即不成花
至若王宮王朝都鄙邦國士庶子萬民萬物以及于
祭祀賓客軍旅器荒每事重重提綴此却如束物之
六匝一職不至即管攝有不周苟得此三義肯移易
周禮乎

周禮有必不可復者如后妃夫人與尸賓獻酬天子
與邦君送迎獻酬及夫升降揖讓三千之儀在後世

必不能行雖遂損之可也至如宮中府中俱為一體
王后世子動遵式法自天子而下有田國采地以處
其子孫寓兵于農取士以賢選用宦守府史胥徒制
馭諸侯四夷後世舍之無以為治此亦不可用耶其
他官職有分合古今異制者不必變今之法但當行
古意于今制之中只如出納王命一事周制極其正
大詳密今之通政給事翰林皆其職也但欲諸人各
得其職君相以公天下之心行之何必泥于大僕內

史宰夫等官又如制國用一事本屬之冢宰今之戶部即其職也但欲戶部等官務為萬民生財之道轉運之方君相一心大革冗費冗員冗食量入為出何必泥于司會大府等官治兵者主于能禦侮而不必拘于軍司馬輿司馬司兵司弓矢治刑者期于無刑而不必拘于鄉士遂士掌囚掌戮要在於變而通之然後可與語行周禮也

詳見內宰司徒鄉遂天宮內史司會條下

世人疑周禮者率以行之者無效也夫後世篡奪者

祖揖讓戰爭者本放伐豈堯舜湯武之過哉王莽動
法先聖以文姦奚止于周禮安石徒得其糟粕以便
其術中間良法美意皆罔然也以是而訾聖經不亦
異哉或以奔者不禁王及后世子不會等語非周公
所作不知此皆註家解釋之誤耳故林孝存謂為黷
亂不驗之書何休以為六國陰謀之書今其書見存
黷亂陰謀安在玩其文義有能作此者雖非周公即
聖人矣

或曰烏鳶蠹葛羽茶炭似于煩瑣夢卜盟詛禱祠似非正大使果周公所作則其學不幾于駁雜不純耶夫周監于二代此等之事皆自古相傳周公因而品節之非必皆周公所創且公之道必及于萬物故凡宇內之昆虫草木咸在其治教政刑之中自有不得而遺者又古人離造化不遠猶知鬼神之情狀故其于鬼神之事為之必効今人為軀殼間隔天人道殊且失古人之法故于夢卜盟詛禱祠之事為之無

徵直截者一切禁絕遂不信有此理孰知周公所以

通于幽明之故哉

詳見天官女祝春官大卜秋官司盟冥氏條下

官多則民擾周禮六官所以經緯乎王畿四海者至
詳且密當時之民恐不勝其擾也是不然此在于官
之賢否何如耳故利民之官不可少害民之官不可
有且周禮親民之官唯其鄉遂都鄙之主而已其餘
若司諫司救媒氏調人皆下其法于其主而自行之
又如布憲每歲首遣之但至于邦國蓋于吏為詳密

于民實闊畧他如匡人擇人掌交掌察則又因事而遣非有常員後世巡行國邑者不得其人各以其意見主張民事甚則有司科斂于民以附益之宜乎有十羊九牧之喻也

三百六十屬公孤官不必備周公以冢宰兼大師名公以司空兼太保蘇公以司寇兼大史此原為兼官者公兼鄉老卿兼鄉大夫軍將皆命卿旅帥皆中大夫此原不別設官以至比長閭師等局分不必設府

史胥徒不別置也有不得不兼者掌馬者即以為馭士庶子等可以為車右也至如揮人訓方因事而遣夏采放相因事而設平日無此官事畢而罷故官雖多而無冗員之病

周公兼官之設使人之所能乘人之所餘事治而不妨功用人而不費祿善物而不費財周禮中此意為多司門多隙地而祭祀之牛牲繫焉橐人多穀食之餘以黍祭祀之犬甸師有餘力帥其徒以薪蒸圉師

習于苦蓋之事則以充樵質翦闔車僕主革蔽之事則以共大射之三乏至于遂師農事之不可緩者則移用其民縣正師役之不可後者則移其執事蓋亦莫非此意他如罪人之執役于園土未嘗以無用妨有用盜賊之任器貨物則入于師兵亦不以有用為無用周公之克勤小物類如此此官事不攝夫子所以譏管氏之不儉也後世之冗費冗員冗食畧不知節而唯餒民之膏血以償之亦當念及此哉

註疏于周禮字有不通者不獨改其聲且改其文全無意義至有的然差謬者却不能正愚取其所改不過百之一二而已

凡諸經各有義例其字面亦有不同初開卷茫然無識惟終卷後反覆再觀其義始見愚得一法以經解經而已故凡初讀時不明處率十之三四次以漸融釋末後尚有疑者不過十之一二遂置不復思記之寓目處使留于心久之此理自然呈露蓋心即天地

聖人之心但為形骸間隔遂蔽復昏塞惟虛靜無我則自開露此天聰明也杜元凱云優而柔之使自求之厭而飫之使自趨之管敬仲云思而不得鬼神將通之皆得此意矣

賈氏正義云按書傳周公一年救亂二年伐商三年踐奄四年建侯衛五年營成周六年制禮作樂所制之禮即此周禮也漢興高堂生傳十七篇自高堂生蕭奮孟卿后倉戴德戴聖是為五傳弟子所謂十七

篇即儀禮也若夫周禮其出特後者馬融傳云秦自孝公已下用商君之法其政酷烈與周官相反始皇禁挾書特疾惡欲絕滅之故焚燒之獨悉是以隱藏百年孝惠除挾書之律開獻書之路時有季氏上周官五篇復入于秘府五家之儒莫得見焉孝成時劉向子歆校理秘書始得列序著于錄畧然亡冬官一篇以致工記足之時衆儒並出共排以為非是唯歆年尚幼務在廣覽乃知其周公致太平之迹且在于

此奈遭天下兵革並起疾疫喪荒弟子死喪彼有里人何南綏氏杜子春尚在永平之初年且九十能通其讀頗識其說賈徽及子達大中大夫鄭興及子大司農衆往傳其業又以經書傳記轉相證明為解其時議郎衛次仲侍中賈景伯南郡太守馬季良亦皆作周禮解詁然猶有參錯同事相違二鄭明理於典籍猶識周官之義存古字發微正讀鄭玄字康成作周禮註多引杜子春鄭大夫司農之義以讚而下之

焉然則周禮起于劉歆而成于鄭玄然林孝存以為
末世瀆亂不驗之書作十論八難以排棄之何休亦
以為六國陰謀之書唯有鄭玄徧覽羣經故能答林
碩之難作為訓注使其義得條通焉其後唐大學博
士賈公彥又撰周禮疏五十卷是為注疏云
通 脩 粗
文中子曰吾視千載以上聖人在上者未有若周公
焉其道則一而經制大備使後之為政有所持循
唐太宗問三代損益何者為當魏徵對曰孔子曰周

監於二代郁郁乎文哉吾從周周禮周公所裁遺談
餘義可舉而行若擇前代憲章發明王道臣請以周
典唯所施行帝大說翌日又召徵入曰朕昨夜讀周
禮真聖作也篇首云惟王建國辨方正位體國經野
設官分職以為民極誠哉深乎良久謂徵曰朕思之
不井田不封建不肉刑而欲行周公之道不可得也
明道先生曰必有闕唯麟趾之意然後可以行周官
之法度愚案淳公之學識其大者可謂盡得周禮之

本矣然詳攷周禮之治莫重于教六官教世子故周
官法度正所以為闕睢麟趾法度無大于此也大抵
周之治必自卑近始必于其所難者而致詳故后夫
人嬪婦女御之教王世子貴遊子之教以至教其宦
寺教其胥徒教百姓女工初若可畧而實則甚切要
為之甚難而其成功則甚易簡此其所以異于後世
之治也

橫渠張先生曰天官之職須襟懷洪大方看得蓋其

規模至大若不得此心欲事事上致曲窮究湊合此
心如是之大必不能得也愚謂周公之心與天地同
體以天下為家又以多才多藝一事一物皆此心散
見及其制作成後莫不與此心湊合六官皆然學者
須先得此心有不通處致曲可也

橫渠又曰太宰之職難看蓋無許大心胃包羅記得
此復忘彼其混混天下之事當如捕龍蛇搏虎豹用
心力看方可其他五官便易看止一職也愚謂大宰

之職若典法則而下凡十條皆總陳治天下之道其餘有春王正月之事有歲終之事有每日之事又有隨時所遇大事具有成法按職行之要之亦一官之事後世此書遂無傳者特以周公于天下事混成在心其作為成書皆自大本中寫出故官雖六而治則一職雖殊而意則通後人無此胥襟各自一職上推求祇見其雜亂紛糾而已學者須于三百六十屬融會而通之運旋得轉乃可以觀此書也

文公先生曰周禮一書周公所以立下許多條貫皆自從廣大心中流出又曰周官徧布精密乃周公運用天理熟爛之書

文公又嘗以為未成之書者然愚觀正歲建牧立監九伐之法巡狩殷國等禮皆防維封建之意豈有後世牧伯專恣之禍又如建其長立其兩與夫都則都士都宗人都司馬等官皆置于都鄙之後豈有世卿之禍如制貢治兵春秋此法猶存至于六官職掌皆

與書同蓋周公攝政時制禮作樂者即此也烏得謂之未成哉但自成康既沒之後綱紀日漸頽廢無大有為之君以舉之遂不可復反若當時未嘗行者文公或未詳覽恐亦記者之誤也

陳同父曰周禮一書先王之遺制具在後有聖人不能加毫末於此矣世儒以為治至周公而術已窮窮則不可復繼周之後必為秦夫子蓋逆言而不言也嗚呼果其窮也則周公之志荒矣自伏羲神農黃帝

已來順風氣之宜而因時制法凡以為人道立極而非有私天下之心也蓋至于周公而集百聖之大成文理密察曲而當盡而不污無復一毫之間而人道備矣人道備則足以通天下之禮而周天下之變變通之理具在周公蓋至此而與天地同流而奚憂其窮哉夫周家之制既定而上下相維至於八百餘年諸侯既已擅立周之王徒擁其虛器叢然立諸侯之上諸侯皆相顧而莫之或廢獨何所畏而不忍哉豈

非周公之制有以維持其不盡叛之心雖顛倒錯亂而猶未底于亡也當時有能變通周公之制而行之天下不必周而周公之術未始窮也

黃度氏周禮說序曰周之道固莫聚于此書他經其散者也周之籍固莫切于此書他經其緩者也公卿敬羣有司廉教法齊備義利均等文武周召之實政在是也奈何使降為度數事物之學哉新昌黃文叔始述五官而為之說疊疊乎孔孟之以理貫事者必

相發明也惻惻乎文武之以已形民者必相經緯也
滌洗劉歆蘇綽王安石之腥穢而一以性命道德啓
後世之公心雖未能表是心而獨行猶將合他經而
並存也

馬端臨氏曰經制至周而詳文物至周而備有一事
必有一官毋足恠者有如閭閻卜祝各設命官羞服
泉貨俱有司屬自漢以來其規模之瑣碎經制之煩
密亦復如此特官名不襲六典之舊耳固未見其為

行周禮而亦未見其異于周禮也獨與百姓交涉之事古今異宜蓋三代之時寰宇悉以封建上之人所以治其民者不帝如祖父之于其子孫田土則少而授老而收又從而視其田業之肥瘠食指之衆寡而為之斟酌區畫俾之均平貨財則盈而斂乏而散又從而補其不足助其不給或賒或貸而俾之足用所以養之者如此司徒之鄉州縣遂歲時讀法攷其德藝糾其過惡而加以勸懲司馬之卒旅師軍四時大

田行其禁令而加以誅賞所以教之者如此其事雖似煩擾而不見其為法之弊者蓋以私土子人痛痒常相關脉絡常相屬雖其時所謂諸侯卿大夫者未必皆賢然既世守其地世撫其民則自不容不視為一體既視為一體則姦弊無由生而良法可以世守矣自封建變而為郡縣國家之法制率以簡易為便慎無擾獄市之說治道去太甚之說遂為經國庇民之速猷所以臨乎其民者未嘗有以養之也苟使之

自無失其養斯可矣未嘗有以教之也苟使之自無失其教斯可矣蓋壤土既廣則志慮有所不能周長吏數易則設施有所不及竟于是法立而姦生令下而詐起處以簡靖猶或庶幾稍涉繁夥則不勝瀆亂矣則知周禮所載凡法制之瑣碎煩密者可行之於封建之時而不可行之于郡縣之後必知時適變者而後可與通經學古之說也

治地事宜

尺

凡地皆從人身起寸指節也尺臂長也尋伸臂而上也約以中人十寸為尺十尺為丈倍丈為引八尺曰尋倍尋為常布帛尺十二寸者天數也周尺六寸四分洛陽測景臺之制猶存其度起黃鐘故短

步


半步曰武一足所履二武曰步兩足所張六尺為步此人生自然之度量田用之自古及今未之有改王

制云古以周尺八尺為步今以周尺六尺四寸為步
古者百畝當今東田百四十六畝三十步東田謂山
東之國以關中在西而言也此不過周末權度不審
故有此繆夫步生于足謂步有不同足亦不同乎
鄧展曰古者百步為畝漢時二百四十步為畝古千
二百畝則得今五頃

趙氏曰古以百步為畝今以二百四十步為畝古百
畝當今之四十一畝也

桑弘羊曰古者制田百步為畝民井田而耕什而籍
一先帝哀憐百姓之愁苦衣食不足制田二百四十
步而一畝率三十而稅一


圖畝為百步



司馬法曰六尺為步步百為畝一目縱橫六尺是謂之步此圖縱橫各十步積為百步是謂一畝

一敵三畎

經一畝



長百步

攷工記匠人為溝洫耜廣五寸二耜為耦一耦之伐廣尺深尺謂之畎班固曰后稷始畎田以二耜為耦廣尺深尺田畎長終畝一畝三畎而播種于畎中苗生葉以上稍耨壟草因墮其土以附苗根比壟盡畎平則根深而能風與旱也 能音奈懋通


二耜為耦兩人並耕也深者為畝畎上高土為伐伐發也兩人所發之土廣尺則伐下之土為深尺矣一步三畎立苗方二尺此法并牧皆然鄭氏曰古者耜

一金兩人併發之 賈氏曰耒頭金廣五寸

按畎壟之法見于趙過蓋凡陸穀初種時必迫于地面則天地氣相接而易滋至其漸長漸潰其土以益之其治地可謂盡善矣若治水田莫善于吳越畎壟之制與此不同大凡地剏廣狹各有所宜所謂廣深尺者亦不可拘當隨種之所宜參酌鄉俗教民為之可也象山先生述其家治田之法用長大鏝頭鋤深至二尺許廣一尺半植一禾大旱時以田肉深獨得

不旱每穗數至二百粒他處不及百粒計所收數倍
深耕易耨之効如此不可不學也

井田助瀆為溝




詩公劉徹田為糧大田雨我公田遂及我私

孟子曰方里而井井九百畝中為公田八家皆私田百畝同養公田公事畢然後敢治私事

方一里之中其田九百畝界為井字中為公田八家皆私田百畝借其力以助耕公田故謂之助八家共耕為通力各私田百畝為均平故謂之徹徹者通也均也通力合作則可計畝均收則不可蓋各入其田之所收故謂之私田若曰均收則公田外為民田不

必分井字不稱為私田矣

牧田貢澮遂溝



孟子國中十一使自賦又曰貢者校數歲之中以為常
千畝之田中為遂九十夫各受田百畝九遂並入于
溝以其無公田每夫各自供其十一之賦故謂之貢
小司徒經土地而井牧其田野 春秋傳井衍沃牧隰
臯

寬平之地為井窄狹之田與夫高下不齊者但可為
牧多則十夫少則雖不足一夫皆可補而授之
司馬法步百為畝畝百為夫夫三為屋屋三為井

步百為畝謂闊一步長百步畝百為夫謂長闊皆百步也

匠人廣尺深尺為畎田首倍之廣二尺深二尺謂之遂九夫為井井間廣四尺深四尺謂之溝

遂人夫間有遂遂上有徑十夫有溝溝上有畛

夫間有遂廣深二尺遂上有徑高廣亦二尺可以通人行十夫有溝廣深四尺溝上有畛高廣亦四尺可以通牛馬

舊說以遂人有十夫字因以為鄉遂用貢法之溝洫
匠人有九夫字因以為都鄙用助法之溝洫愚謂凡
耕者皆為橫畎以入于遂一步為三畎立苗方二尺
此樹植之法井牧皆然也夫間有遂遂上有徑十夫
有溝溝上有畛大抵田首之水入于溝亦井牧所同
也但井限于九夫牧則十夫此微不同然所謂九夫
者乃九夫之地非九家也且每井有餘夫等受田一
井實不止九夫故舉成數言豈可因此而遂分鄉遂

都鄙有二法乎

公田二十畝為廬舍

春秋穀梁傳曰古者方三百步為里名曰井田井田者九百畝公田居一公田為居井竈葱韭取焉

班固曰理民之道地著為本故必建步立畝正其經界六尺為步步百為畝畝百為夫夫三為屋屋三為井井方一里是為九夫八家共之各受私田百畝公田十畝是為八百八十畝餘二十畝以為廬舍環廬樹桑菜茹

有畦瓜瓠果菘植於疆場在野曰廬在邑曰里春則令
民畢出在野冬則畢入於邑 何休曰一夫一婦受田
百畝公田十畝廬舍二畝半凡為田一頃十二畝半八
家而九頃共為一井故曰井田 趙氏曰古者一夫一
婦受私田百畝公田十畝八家是為八百八十畝餘公
田二十畝八家分之得二畝半以為廬舍城邑之居亦
各得二畝半廬各在田中而里聚居

季氏云公田為廬舍之說起于穀梁諸儒遂以在邑

在野各分二畝半以合孟子五畝之說若公田之中
去二十畝止存八十畝則制祿之時又當割別井之
田以足百畝之數不惟失先王正經界之意而又以
邑處農民亦有不便蓋一夫一婦食力之小人也就
田斯可以治農業而死徙無出鄉又同井者之所安
也冬則入邑春則出野雖近郊之地住近國中猶以
搬運為煩不欲輕動而况遠郊之外必使遠棄田疇
徙居國邑人誰樂之先王之立此法果何義邪且孟

子言五畝之宅未嘗以為廬舍也信南山詩中田有廬者八家各于田中小苫茅舍以為息勞守畝之所耳蓋農民所宅必是平原可居之地另以五畝為一處不占公田也然亦取於便農功邇饁餉去田豈宜遠哉其所聚居或止八家或倍八家以上各隨便宜合為一邑置堡設城以相守望故舉成數言則有十室之邑千室之邑丁男之有妻者為室室亦家也所主在於同井無出鄉而已非必都邑然後為邑而都

邑亦豈可以寓農民哉故農民之宅與國中之廛不同農民之宅鄉里也即制里而導其妻子養老者也國中之廛市廛也但為士旅寄居之所工商懋遷之區而已而農人入居焉則徙業無常非所以為安矣故管子作內政有曰四民雜處則其言唯其事易聖王處士就閒燕處工就官府處商就市井處農就田野少而習焉其心安焉不見異物而遷焉其父兄之教不肅而成其子弟之化不勞而能是故士之子恒

為士工之子恒為工商之子恒為商農之子恒為農
農則野處而不暱韋昭所謂國都城郭之域惟士工
商而已農不在焉此古法之僅存者也諸儒但見後
世四民混而為一遂謂人皆有兩宅焉此但可以富
室踰侈者言耳豈所以語土著之農夫哉

應電按穀梁先秦人其言有自班固何休趙岐宗之似
于有徵但公田去二十畝為廬舍止八十畝誠于制祿
有妨而冬邑春郊出入煩擾亦非人情所樂此季氏獨

見之言辨析甚善然觀周禮上地田萊一百五十畝其食者三之二其民可用者家三人中地田萊二百畝其食者半其民可用者二家五人下地田萊三百畝其食者三之一其民可用者家二人乃知畫為井田者此定法也而田有上中下則居民之八家不可得而拘中為公田者此定法也而田亦有上中下則百畝之入亦不可得而拘故使田極肥厚而土窄無萊田則一井止于八家此即匠人孟子司馬法之常制也田瘠薄而人稀

則一井三家而不足此即後世儘民開墾之法也都邑相近則民不野宿而公田之百畝無缺此季氏所疑之言也都邑相遠則民當野宿而公田之百畝不足此穀梁諸儒之所言也蓋公田已足則百畝為實而用以制祿公田不足則百畝為虛而當有以益之此猶後世之叙祿者云食封若干而其數多食實封若干而其數少如此則周禮孟子班氏季氏其言皆無窒礙矣况公田皆藉民力所收自倍于私田雖八十畝亦足以當百畝

也

十一說

凡十一之制有十之內取其一者貢法是也有十之外取其一者公田二十畝為廬舍民所耕田共一百一十畝是也有九分而取其一者公田無廬舍官皆取之九百畝中取一百畝是也大約不出十之上下故總謂之十一

圖田受與疆夫餘

世一

母 父

弟 弟 夫
婦 妻

子 子 子 子

世二

母 父

弟 弟 夫
婦 妻
子 子 子 子
婦

一夫上父母下妻子旁有兄弟為家受百畝之田上地
菜五十畝中地菜百畝下地菜二百畝故自七人至五
人可任者三人至二人皆食于百畝之內七人至五人
外又有弟六尺已上可任男子征役之事乃受餘夫田
二十五畝如有數弟則各受田二十五畝以養其妻子
孟子所謂餘夫二十五畝弟雖生子猶同居故兄弟之
子為猶子其相謂為同堂兄弟也

夫與弟各生孫則夫與弟又為父夫與弟之冢子為夫

次子為餘夫孫為子各成一家夫之冢子受原田諸弟
冢子各受百畝之田遂人所謂夫一廛餘夫亦如之也
世次相降其法皆然

餘夫疆與受田說

易曰父父子子兄兄弟弟夫夫婦婦而家道正蓋必三
親具而後成家也周禮大司徒任民之法上自七人下
至五人而後謂之家蓋必聯于兄弟也故上地足以供
七人中地足以供六人下地足以供五人此外別有弟

六尺以上可任男子之事百畝不足以供別受餘夫田二十五畝當今之十餘畝雖有室有子昏食其內亦無不贍若其長子孫二十五畝不足以供然後如夫之授以廛田萊蓋自正夫言必人浮于所食田之數方加以餘夫田自餘夫言必人足以當所食田之數方授以足田也觀先王之法父子兄弟永無分居之理骨肉之親有天倫之樂無離索之憂一善也諸弟各有餘夫田寬裕自生禮讓而無迫促畔怨之患二善也有孫則別居

受田既以休老又使夫人各私其親以盡人子之情三善也長子世守田里廬舍支子以次宗之默寓宗法四善也或疑朱子云壯而有室然後受百畝之田與此不同何也夫壯而有室上無父母下無子孫即可謂之單丁也安得與八九人之家同受田此本賈氏疏云年二十九已下未有妻受口田二十五畝三十有妻則受夫田百畝一歲之間因有妻而遂加田七十五畝寧不至于荒蕪耶故餘夫非丁衆屢不足以容田不足于食不

可授以百畝也以此言之凡有單丁一夫一婦者亦止
可受餘夫田不當受百畝田經載未盡耳苟凡壯而有
室即受廛別居受田別耕年少地廣零丁孤苦普天之
人並無父子兄弟之樂王政乃所以厲民矣或又云土
田有限凡創業之時土荒民散則受田之法為可行也
承平日久生齒日繁其法將不可通耶是不然天地之
化形氣逼塞于穹壤間有是土田而後足以生是人有
是人必有以足其食自一方言則有寬狹自大塊言有

民稠之地必有土曠之處唯患上之人不為之裁制耳
是故狹鄉則徙于寬鄉民不病地寡而無爭地空地則
募民徙實地不病人稀而無曠土此周之先公所以世
有遷都之舉也豈若後世不為制民之產而有有餘不
足之處况乘除者理勢之自然得氣有厚薄則子孫有
多寡數世蕃衍則後多無嗣孰謂天下之地不足以養
天下之人哉

三等夫受田

地工

田百畝

菜十五畝

地中

田百畝

菜百畝

地下

一歲曰菑
田百畝

二歲曰畲
菜百畝

三歲曰新田
菜百畝

授菜田法

凡上地菜田有在一處者則右圖是也有美田不可為菜者則當別授之菜田更在他處也凡耕菜田有以百畝而二易一歲曰菑二歲曰畲三歲曰新田是也有菜在別處則當雜植以助正田

凡公田之入亦當以上中下三等之田計之故有三井而當一者有二井而當一者有一井而當一者夏官量人云凡班賞地三之一食賞地多閒田故率三井而當

一井此可以為証

井田夫家總論

孟子曰方里而井井九百畝中為公田八家皆私田百畝然周初時闢土分田不盡然者大司徒不易之地家百畝一易之地家二百畝再易之地家三百畝遂人上地夫一廛田百畝菜五十畝餘夫亦如之中地夫一廛田百畝菜百畝餘夫亦如之下地夫一廛田百畝菜二百畝餘夫亦如之小司徒上地家七人可任也者家三

人中地家六處可任也者二家五人下地家五人可任也者家二人大司馬上地食者三之二中地食者半下地食者三之一三等之地經中四見皆然分土任民侯國與王國鄉遂公邑與采地並不容有異夫不易者膏腴上地而必益以菜五十畝者常使地力有餘不至耗竭草萊葑淤田益肥美家有餘利自生禮讓生齒日蕃有田可耕也三分而食其二故曰食者三之二每一夫田百畝菜五十畝所占夫半之地是一井中實止六夫

而不足矣一易者肥瘠平之中地休一歲而種其獲與上地等益以萊百畝二分而食其一故曰食者半每一夫田二百畝所占二夫之地是一井中實止四夫也再易者瘠薄下地休二歲而種其獲與上地等益以萊三百畝三分而食其一故曰食者三之一每一夫田三百畝所占三夫之地是一井中實三夫而不足也井田之界限有定而夫之分受不齊如此夫有休伐之法則田之所收固無不均但不易則用人工少易則費人工多

故上地之入食七人而可任者家三人中地之入食六人而可任者二家五人下地之入食五人而可任者家二人正夫足其所食人之數而又有可任者即受餘夫田餘夫而滿其七人六人五人之數者別受正夫田大約以上中下三等之地總而計之每一井田通融而論止于四家可用之民十人而已若舊泥于一夫百畝然田有高下口有多寡似均而實不均也唯其以上中下三等之田授之有一百五十畝二百畝三百畝多寡之

三等上中下三等農夫可任之民亦有家三人二家五人家二人多寡之三等然後為均平以此知古人云八家同井蓋治久齒繁井田大治之時耳初闢地之時不可為也欲知井田夫家之數當攷于周禮可也

程張井地語錄

二程謂地形不必謂寬平可以畫方只可用算法折計地畝授民子厚謂必先正經界經界不正則法終不定地有坳埳處不管只觀四標竿中間地雖不平饒

與民無害又經界必須正南北假使地形有寬狹尖
斜經界則不避山河之曲其田則就得井處為井不
能就成處或五七或三四或一夫其實田數則在又
或就不成一夫處亦可計百畝之數而授之無不可
行者如此則經界隨山隨河皆不害於畫之也苟如
此畫定雖便使暴君汙吏亦數百年壞不得經界之
壞亦非專在秦時其來亦遠漸有壞矣或謂井議不
可輕示人恐致笑及有議論子厚謂有笑有議論則

方有益也又謂若有人聞其說取之以為己功先生云如有能者則已願受一廛而為氓亦幸也伯淳言井田今取民使貧富均則願者衆不願者寡正叔言亦未可言民情怨怒止論不可爾須使上下都無些怨怒方可行

二程問官戶占田過制者如何如文曾有田極多只消與五十里采地儘多又問其他如何今之公卿非如古之公卿舊有田多者與之采地多槩與之則無以

別有田者無田者

朱子開阡陌辯

阡陌者舊說以為田間之道蓋因田之疆畔制其廣狹
與其縱橫以通人物之往來即周禮遂上之徑溝上之
畛洫上之涂澮上之道也蓋陌之言百也遂洫縱而徑
涂亦縱則遂間百畝洫間百夫而徑涂為陌矣阡之為
言千也溝澮橫而畛道亦橫則溝間千畝澮間千夫而
畛道為阡矣阡陌之名由此而得至于萬夫有川而川

上之路周其外其與匠人井田之制遂溝洫澮亦皆四
周則阡陌之名疑亦因其縱橫而命之然遂廣一尺澮
二尋則丈有六尺徑容牛馬畛容大車涂容乘車一軌
道二軌路三軌則幾二丈矣此其水陸占地不得為田
者頗多先王非虛棄之所以正經界正侵爭時蓄泄備
水旱為永久之計有不得不然者商君以急刻之心行
苟且之政盡開阡陌悉除禁限聽民兼併買賣以盡人
力墾闢棄地悉為田疇而不使有尺寸之遺以盡地利

蓋一時之害雖除而千古聖賢傳授精微之意于此盡矣又曰所謂開者乃破壞剝削之意而非開置建立之名所謂阡陌乃三代井田之舊而非秦之所置矣

季氏正大餘夫田圖說

上農夫	全耕百畝
-----	------

中農夫	耕七十五畝
餘夫耕	二十五畝


下農夫	耕五十畝
餘夫	餘夫

季氏云孟子耕者之所獲一夫百畝百畝之糞上農
夫食九人上次食八人中食七人中次食六人下食
五人庶人在官者其祿以是為差一夫百畝非謂一
夫一婦佃田百畝也蓋九夫為井之夫謂百畝之田
為一夫之地也一人之力止可以耕二十五畝則百
畝者四人之力所耕也上中下農夫皆正夫自公田
八分之一外上農夫自受私田百畝中農夫受七十
五畝餘二十五畝授餘夫下農夫受五十畝餘五十

畝更授一下農夫或授二餘夫理皆可通上食九人
八人中食七人六人下食五人計其所食之口而耕
田之所獲適足以供之也庶人在官者事有繁簡則
人有衆寡而祿宜有差故計農夫所食之數以明之
豈謂不論人力多寡皆耕百畝聽其為惰農而漫無
勸督均齊之法哉季氏又云農家受田其實每人止
可耕二十五畝但自受田之長而言則曰匹夫而總
謂之一夫百畝耳

按孟子之意當如朱子註同授田而以糞力為上下
苟以授田有此三等則上次中次說不去矣且經中
明言七人六人五人三等則不及人數者不受足田
在其中矣以其足以明餘夫受田之法故存之


井邑丘甸圖



小司徒云九夫為井以步百為畝畝百為夫計之故曰九夫地有上中下大約一夫耕二夫之地每井實則四家四井為邑十六家論語曰十室之邑是也四邑為丘十六井六十四家丘之為言聚也舜所居二年成聚是也司馬法有戎馬一匹牛三頭畢賦之法期于甸而魯成公作丘甲春秋所以識其重賦也四丘為甸六十四井二百五十六家司馬法有戎馬四匹兵車一乘步卒七十五人又重車一乘將之者二十五人二車共百人

甸之為言用以佃獸之名也一甸出車一乘可以軍旅
田役故名

丘甸縣都圖



四甸為縣二百五十六井一千二十四家出兵車四乘
四縣為都一千二十四井四千九十六家出兵車十六
乘

都字从諸省從邑言諸邑之所會也

凡丘甸縣都皆據井邑居民而立名所謂以室數制之
其出車當捉零就整非可以道里計也二圖正方姑發
明其名數而已

井十為通

溝廣深四尺溝工有畛高廣如溝



遂人百夫有洫洫上有涂司馬法井十為通通為匹馬
士一人徒二人一溝受十夫一井之遂十溝八一洫則
為十井而百夫矣故曰百夫有洫井十為通言百夫通
力而治一洫又十井通力以興耜也

涂之高廣如洫容乘車一軌涂之盡處有輿梁

牧之夫數十故有百千萬夫井之田數限于九大數限
于八此紀夫並以十者凡餘夫單丁及士工賈之受田
不過二十餘畝其實每井必有十餘夫故舉其成數言也

成爲于通

通	通	通	通	通	通	通	通	通	通
井	井	井	井	井	井	井	井	井	井
井	井	井	井	井	井	井	井	井	井
井	井	井	井	井	井	井	井	井	井
井	井	井	井	井	井	井	井	井	井
井	井	井	井	井	井	井	井	井	井
井	井	井	井	井	井	井	井	井	井
井	井	井	井	井	井	井	井	井	井
井	井	井	井	井	井	井	井	井	井
井	井	井	井	井	井	井	井	井	井
井	井	井	井	井	井	井	井	井	井
井	井	井	井	井	井	井	井	井	井
井	井	井	井	井	井	井	井	井	井
井	井	井	井	井	井	井	井	井	井
井	井	井	井	井	井	井	井	井	井
井	井	井	井	井	井	井	井	井	井

會嚴二野然二分滄上有道高嚴如滄

周禮異傳

遂人千夫有澮澮上有道

司馬法通十為成成百井革車一乘士十人徒二十人
匠人方十里為成成間廣八尺深八尺謂之澮

一澮受十井百夫之水十澮共八一澮則為百井而千
夫矣故曰千夫有澮通十為成言十澮方百井井田之
法于是而成也

一成百井千夫除山川等三分之一倣佛甸之六十四
井以上中下三等計之一夫耕二夫之地每井止四家

為戶二百五十六約五戶而出二卒故為士十人革車
一乘

道之高廣如澮容乘車二軌

成十為漕

成	成
成	成
成	成
成	成
成	成
成	成
成	成
成	成
成	成

川廣四尋深四仞

川工有路高廣如川

遂人萬夫有川川上有路以達于畿

司馬法成十為終終千井革車十乘士百人徒二百人
千夫為澮十澮共入一川則為千井而萬夫矣故曰萬
夫有川成十為終言十成之水共歸于一川因山川之
勢而加以人功疏導水有所終故以取義也自川則可
以達于四瀆矣

詩云駿發爾私終三十里亦服爾耜十千惟耦終直二
十五里曰三十里十千耦皆舉成數極言之

以地方言為千井萬夫除山川道路等三分之一為二
縣零二甸之地總為十甸共六百四十井出兵車十乘
路之高廣如川容乘車三軌

同為十終

終	終	終	終	終	終	終	終	終	終
成	成	成	成	成	成	成	成	成	成
成	成	成	成	成	成	成	成	成	成
成	成	成	成	成	成	成	成	成	成
成	成	成	成	成	成	成	成	成	成
成	成	成	成	成	成	成	成	成	成
成	成	成	成	成	成	成	成	成	成
成	成	成	成	成	成	成	成	成	成
成	成	成	成	成	成	成	成	成	成
成	成	成	成	成	成	成	成	成	成
成	成	成	成	成	成	成	成	成	成
成	成	成	成	成	成	成	成	成	成
成	成	成	成	成	成	成	成	成	成
成	成	成	成	成	成	成	成	成	成
川	川	川	川	川	川	川	川	川	川

(汗 汗)

司馬法終十為同同方百里革車百乘士千人徒二千人終千井萬夫十終則提封萬井十萬夫直二十五里四面方一百里謂之同者言雷震百里其聲相同也

同間廣四尋深四仞為川一同之中其川九其外為大川以達于畿者也每一目當一成以地方計之雖有萬井十萬家除山川道路三分之一總為百甸之地六千四百井每井止四家為戶二萬六千四百約五戶而出二卒故為士千人二百五十餘戶而出一車故為革車

百乘

井田溝洫澮川用田數

一井之溝

長九百步

溝上之畛

各廣四尺共八尺積一千二百步

計田十二畝

井十為通溝畛十

積一萬二千步

計田一夫零二十畝

十井

之洫

長二千步

洫上之涂

各廣八尺共二百四尺積八千步

計田八十畝

已上十井溝畛合洫涂共計田二百畝該二夫

通十為成百井洫涂十計田二千畝該二井零二夫

百井之澮

長一萬步

澮上之道

各廣二尋共五步二尺積一萬六千步

計田一

夫零六十畝

已上百井溝畛洫涂合澮道共計田二千一百六十畝該二井三夫零六十畝

成十為終一千井澮道十計田二萬二千六百畝該二

十四井

千井之川

長三萬步

川上之路

各廣四尋共十步四尺積三十二萬

步計田三千二百畝該三井零五夫

已上溝畛洫涂澮道合川路共計田三萬四千八百

畝該二十七井零五夫

終十為同一萬井川路十共計田二十四萬八千畝該
二百七十五井零五夫

已上每同溝洫澮川大約費田不及百分之三
是百里費田三里千里費田三十里古今以費
田為憂而秦人之所開要不過此奈何計此
小利而坐失大利乎愚觀古法治水以道里
計出賦去三分之一則溝洫已在其中而人
猶疑之因詳述如右

諸侯封地實封食祿攷

按書武成孟子王制所言畿封之制多有抵牾愚嘗以周禮為據而後得其說也凡封國有管轄之地有實封之地有所食之田周禮上公之地方五百里侯方四百里伯方三百里子方二百里男方百里即詩之錫之山川土田附庸司馬遷所謂周封伯禽康叔于魯衛地四百里太公于齊兼五諸侯地正與周禮制合此管轄之地也其言食者半三之一四之一者此其實封之地今

觀春秋齊魯等國封疆皆可驗也孟子所言君十卿祿者大國君田三萬二千畝次國君田二萬四千畝小國君田一萬六千畝此一歲君所自食之祿也故以司馬法同封之制合職方氏封國之法而計之天子千里之地為田一千六百同出車一萬六千乘徒一百六十萬人諸公地方五百里為田四百同除附庸之國其食者四之一實封田一百同出車一千乘徒十萬人故為王畿十分之一若如王制拘以百里止得天子百之一而

己侯之地四百里為田二百五十六同除附庸之國其
食者三之一實封田八十五同出車八百五十乘徒八
萬四千人伯之地三百里為田一百四十四同除附庸
之國其食者三之一實封田四十八同出車四百八十
乘徒四萬八千人子之國二百里為田六十四同除附
庸之國其食者半實封田三十二同出車三百二十乘
徒三萬二千人男之地百里為田十六同其食者半食
封田八同出車八十乘故以千里之地大約封公者四

國其食者四之一封侯者六國封伯者十一國其食者三之一封子之國二十五封男之國百其食者半自所食之外皆為附庸之國矣若如王制之說州方千里州建百里之國三十七十里之國六十五十里之國百有二十凡二百一十國即如方百里之國為田十六同出車一百六十乘大國三軍合用三百七十五乘將安取辦乎此其說誠不可通矣 畿內采地孟子云天子之卿受地視侯大夫受地視伯元士受地視子男王制云

天子三公之田視公侯卿視伯大夫視子男元士視附庸周禮載師以家邑之田任稍地以小都之田任縣地以大都之田任疆地大約公處于大都孤卿處于小都中大夫處于家邑夫天子畿內之地不過千里苟三公之田視公不幾于半天子之疆乎是不然王畿之縣都不世量山川人民以為都邑而使掌其治教賦稅非若諸侯之封國割其地以與之故天官九兩一曰牧以地得民二曰主則以利得民而已所謂受地者但可言其

所食與出封耳且孟子王制所述視地有不同者嘗觀
春秋所書王臣三公稱公卿稱伯中大夫稱子下大夫
稱字元士中士稱名下士稱人列國唯命卿以名登于
冊大夫謂之微者稱人而已故周禮掌客云三公眡上
公之禮卿眡侯伯之禮大夫眡子男之禮士眡諸侯之
卿禮庶子一眡其大夫之禮典命云王之三公八命其
卿六命其大夫四命及其出封皆加一等故三公在朝
則食大國君之祿出封則為上公之國六卿在朝則食

次國君之祿出封則為侯伯之國中大夫在朝則食小國君之祿出封則為子男之國下大夫食大國孤之祿出封則為附庸之國元士之爵眡諸侯之卿中士之爵眡諸侯之大夫下士之爵眡諸侯之上士而其祿則自下大夫而下並與諸侯之臣同何嘗如王制所云天子縣內凡九十三國耶蓋唯畿內不以封也故大而縣都小而公邑皆可以治如召公之循行南國畢公之允釐東郊銜命而往單車可代自無僭逼之嫌苟如孟子所

言萬取千焉則非唯無是地而亦必至于篡弑之相尋
矣苟如王制所封之地又何必設朝大夫都宗人都司
馬都則都士等官而以八則馭之乎唯其祿視夫諸侯
之所食是故公食三百二十井三公為田九百六十井
孤卿食二百四十井三孤六卿為田二千一百六十井
中大夫食一百六十井周禮五官共中大夫三十一人
合冬官不過四十人之數為田六千四百井雖舉朝公
卿中大夫之祿不過九千五百餘井尚不及一同公田

故雖告老而猶食于家必有大故而後收其田里八柄
所謂奪以馭其貧也及其身歿而子孫猶得世其祿蓋
非世其公卿大夫之祿也記曰天下無生而貴者天子
之元子士也是故無大夫冠禮而有其士禮蓋但世其
士之祿耳故仕者之子孫賢則命之爵不賢則祿足以
代耕圭田足以祭祀所謂天子有田以處其子孫也故
以畿外邦國言漸遠所尊者雖大如上公不過天子十
分之一已執夫居重馭輕之勢小如子男亦出百車百

餘乘而足以守宗廟之典籍以畿內縣都言密邇所尊者子弟雖賢而不世自足以待無窮之賢縣都雖大而不有自不虞夫僭逼之患至其後世王畿則子弟襲封侯國則大夫世爵而有孟子大家弑奪之說諸侯則併吞附庸大夫則分裂公室而有孔子陪臣執國命之譏與夫王章一掃而空而封建遂為一大弊矣大抵孟子之說略王制之說拘惟一據夫周禮以圖攷之然後知其立法之妙而可以盡見夫先王精意之全也或疑諸

公方五百里其食者四之一為一百二十五里諸侯方
四百里其食者三之一為一百三十三里則侯地反多
于公乎是不然經文于封畷定其里數而其食則就其
中為之等而未嘗定其里數蓋地大則中包廣而外之
里數反少地小則有四邊而外之里數反多不可以里
計也故公田四百同四之一為實封一百同侯田二百
五十六同三之一則為實封八十五同此其多寡之數
自有等級而不相混矣或以諸男實封八同出車八

十乘小國一軍合有一百三十五乘此則一軍而不足何以立國乎蓋八十乘之車為三師而有餘故或益之地以足一軍之數或止于三師亦可以應敵其制不可得而詳矣

丘甸通成出車合一

司馬法曰四井為邑四邑為丘丘有戎馬一匹牛三頭是謂匹馬丘牛四丘為甸出長轂一乘馬四匹牛十二頭甲士三人步卒七十二人戈楯具謂之乘馬四甸為

縣兵車四乘四縣為都兵車十六乘 此不計道里專
以都鄙居民之數而出兵賦之法所謂縣都者非甸稍
縣都之云也彼縣即小都都即大都地方百里此則不
及一同之地不過用以出賦之名耳此據周禮小司徒
舊法而述之也

又司馬法曰六尺為步步百為畝畝百為夫夫三為屋
屋三為井井十為通通為匹馬三十家士一人徒二人
通十為成成百井二百家革車一乘士十人徒二十人

十成為終終千井三千家革車十乘士百人徒二百人
十終為同方百里萬井三萬家革車百乘士千人徒二
千人 夫均之為司馬法也甸方六十四井出車一乘
成為百井亦出車一乘者甸以室數計之指其實數成
以道里計之兼山川道涂等虛數也故一同提封萬井
除山川沈斥城池邑居園圃術路三千六百井定出賦
六千四百井又以上中下二等之地計之一夫耕二夫
之地每井止四家一同共二萬五千家出車百乘若以

一成百井計之除山川等三分之一定出賦六十四井
正合甸之田數一夫耕二夫之地為二百五十餘家出
車一乘亦與甸之車數相符今云一同萬井三萬家者
此不過一直算法耳蓋不必除其虛地亦不必計上中
下受地之差而俱以下地紀數畝百為夫非實指一匹
夫謂一夫之地也夫三為屋者俱以下地為筭三夫之
地為一屋即為一家故一通十井而為三十家一成百
井而為三百家出車一乘歸于一同萬井為三萬家出

車百乘其數蓋無不同也

丘甸通成士徒合一

諸家之說以為通成終同畿內采地法一乘士十人徒二十人凡三十人士多而徒少井邑丘甸畿外邦國法一乘士三人徒七十二人士少而徒多以為內外之制孰知夫丘甸之法必一乘百人者兵無竒正則死故有前拒左角右角以為更休兵無輜重則亡故有重車以為根本兵無什長則亂故有士十人以相什伯凡有此

車必有此人數此必然之法通成終同之出車豈能外此故一通十井三十家內合有徒十人而云徒二人者五人為伍伍皆有長以其長之寓于徒內故稱徒二人也士一人者每徒十則有一士率之也成百井三百家革車一乘合有徒百人云二十人者亦指其伍長故止二十人言士十人者兼隊正隊副百夫長甲士而言也然則百人之數何嘗與丘甸異豈有有是車而無是人之理遂謂畿內采地一乘三十人畿外邦國一乘百人

不亦謬哉

丘甸旁加一里之非

井邑丘甸縣都乃計民以出兵賦之法不當以道里而論井通成終同乃計田以治水之法故必以道里論故十夫有溝百夫有洫千夫有澮萬夫有川夫皆在于田內有田即有溝洫有溝洫即有夫豈有中出稅而外治溝洫之理丘甸去山川而即其居民之實數故六十四井出車一乘一成包川澮而言故為百井苟除三分之

一亦與甸之六十四井同亦出車一乘豈謂一甸之地
旁加一里而後與成合哉

井田車馬兵器

據司馬法六十四井出兵車重車各一乘夫每井通計
止于四家共為二百五十六家大較六十家而出一馬
二十家而出一牛五家而出一卒民不已病乎蓋重車
民間常器牛民間常畜馬亦民間之不可缺者每井雖
止四家而可任者常有十人是六百四十人中取百人

以為徒也唯兵車與兵器則一甸之中共出財備之耳然此但謂一甸之中有此車與徒耳非取之以為用也觀自古所稱天子諸侯之車數可以見之蓋每十分而簡稽其一故每同不過出車十乘卒千人凡封國之數皆以此為準

成周兵民之制

人動物也非役役于善即役役于不善吉人為善勤勞而不知凶人為不善勤勞亦不知為之皆出于其中心

以志帥氣故也民可使由之聖王之政不過率之以勤
勞于善而已勤勞則淫僻無自生變故不能怵偷惰則
善心無自生變故不能支故周禮設官居家則有比閭
族邨州鄉隣里鄴鄙縣遂以施教化在野則為井邑丘
甸縣都通成終同以相什伯大司馬所握之六軍內以
役于王都更休而不竭外以制于四方調遣而有餘是
故月朔孟月習之于俎豆禮樂使其優游于儀文度數
之間而密消其粗悍暴厲之氣三時靡不力田趨其耕

耨行其秩叙使無有無事而食之人歲時簡其兵器以
為備四仲教之師田以為用而常時則率之以朝覲會
同征伐追胥使之常閑于行役而不以為難安于勞苦
而不以為病是故姦慝禍亂而不作刑罰兵革而不用
也雖然鼂錯有言人情莫不欲逸三王節其力而不盡
豈周之民終歲勤動而不得息者耶愚嘗合周制土田
居民之數而得其說矣故以王畿千里居民之數計之
為田一千六百同每同除山澤邑居溝渠道路等三分

之一為六千四百井每井以上中下三等不易一易再
易計之一夫耕二夫之地實止四家以可任者三人至
二人計之每井十人故每同二萬五千餘家可任者六
萬四千人出車百乘徒萬人每五家而出二人可任者
六人而用其一也是千里之地合有四千萬家為車十
六萬乘矣然自古稱天子曰萬乘則十六倍而用其一
四十家用其一人而已又以鄉遂居民之數計之近郊
遠郊四面各地方二百里為田六十四同每同二萬五


千家合有一百六十萬家矣及觀鄉遂序官之數比隣之長共三萬人所統止于十五萬家是一家而兼十家每一比長所統五十餘家矣夫丘甸之法兵皆設而不
用比閭之法戶皆有餘而不藉何也蓋有居民可任之數用以力田治水田獵追胥每同可任者十萬餘人是
也有丘甸出車之數每同出車百乘徒萬人是也有簡稽之數苟盡簡閱之則民不勝其疲故如載師之法自
十一而至于二十三每五分而稽其一必十餘載而一

周其比閭之法則以一家而兼十家所以統轄乎民者必十年而一周推此二法即如今之設里者計一而藏九休九而用一其法不得不然也至以調遣言則行者有暑寒鋒鏑之苦居者有離索怨曠之思是豈可輕發而多用哉故大司馬所統不過六軍為車七百五十乘為徒七萬五千人于千里之內更番而調遣之其優裕而不迫均遍而不頗類如此是故天子出必有六軍君行師從卿行旅從徵發而不至于空虛行役而不以為

勞苦居足以守而無虞出足以戰而無敵田足以耕而
不乏食老幼廢疾有養而無失所此周制之所以為善
也且夫車馬器械皆平日之簡稽委積芻薪隨道里而
貯峙吉行五十里軍行三十里勞中而有逸將必知兵
兵必順民行險而不危故易曰毒天下而民從之也後
世之民其佚者歟則漫然無教驕奢淫慾不遺餘力遇
有警急則束手無策延頸待斃其勞者歟則征伐四出
成役無節死亡相繼至發閭左千里蕭條天下騷然其

不至于敗亡也者幾希

十家為一國





大司徒五家為比使之相保鄉大夫比長五家下士一人族師五家為比十家為聯

比之為言以比次之義使相保不得為惡五家之中擇其優于衆者以為之長秩為下士祿比庶人在官掌其比之治十家為聯相與對門者尤切近也每一園為一家一家總十家五園為五家一比長所統五十家

按六鄉六遂近郊遠郊四面各百里為田六十四同

每同為二萬五千餘家合有一百六十萬餘家今觀
六鄉六遂序官之數比鄰之長共三萬人所統止于
十五萬家是一家而兼十家每一比長所統五十家
矣蓋凡比與其長之員有定而其民則十倍而有餘
歲以五家為正以其餘為副十年一周名則五家而
所統實五十家故公私之事歲無所缺祿不見其多
而民不知擾也

已後圖每比實統五十家並同

八間為聯圖

五為二為
五比十為
圖圖圖圖



間門下同


周禮異傳

大司徒五比為閭使之相受閭胥每閭中士一人閭之為言五比二十五家二閭五十家同巷而居旁有閭門故以閭名平旦閭胥及隣長坐于左右塾以帥民者鄉大大國有大故令民守其閭修閭氏令守其閭互也

四閭為族使之相葬族師每族上士一人族之為言以其相葬埋有同宗合族之義也

族師五家為比十家為聯五家相與對門者尤切近也四閭為族八閭為縣二百家團聚而居者相通與族同也

圖 鄉 為 州 五



每一圈為族五圈為黨五百家大司徒五族為黨使之相救黨正每黨下大夫一人黨者以其患難相救互相黨與之義也

五黨為州使之相調

州長每州中大夫一人州之為言周也

五州為鄉使之相賓


鄉大夫每鄉卿一人

鄉老二鄉則公一人

五人為伍圖

○ ○ ○ ○ ○

天司馬五人
為伍伍皆有
長在五人之中
無命爵



馬

○ ○ ○ ○ ○
○ ○ ○ ○ ○
○ ○ ○ ○ ○
○ ○ ○ ○ ○

大司馬二十五人為兩兩司馬皆中士小司馬五伍為

兩

古法每百人乘車大車各一乘一車兩輪因謂車為兩
凡車有正必有副則百人當有車四兩二十五人合有
車一兩此兩之所由名也每一圜為一人五伍二十五
人通兩司馬二十六人

二兩為隊圖

兩司馬 卒長 兩司馬




旅師五人為伍二伍為聯

穰苴法五人為伍十伍為隊即二兩而為隊也有正副
隊長二人即後世隊頭副隊頭

一團為一人通兩司馬正副隊長共五十四人

四兩為卒圖




大司馬百人為卒卒長皆上士小司徒四兩為卒

周制每車一乘甲士三人步卒七十五人以為前拒左
角右角各二十五人重車一乘將之者二十五人一圜
一人合兩司馬四人五十人隊長四人卒正副二人共
一百十人舊說步卒七十二人三兩各缺一人又缺兩
司馬五十人長泥于百人為卒而誤也司馬法云革車
一乘士十人徒二十人者蓋伍皆有長百人則伍長二
十人以其藏于伍內故止稱徒二十人兩司馬四人五

十人隊長四人卒正二人為士十人也卒之為言終也
自伍兩而下其兵皆未可用至于卒則有車一乘其兵
百人兵馬自此而成故以為名雖不足用然使遇小敵
得一梟將將之此百人如丁布旅之法亦可制勝無當
也

五卒為旅圖



周禮大司馬五百人為旅旅師皆下大夫 小司徒五
兩為卒每一圈為一伍五人五圈為一兩二十五人
旅之為言衆也兵車五乘統五百人故以旅名少康有
衆一旅是也兵雖少然能竒正分合亦足為用大約中
四兩為中軍四正每正二兩為正軍每隅一兩為竒軍
後四兩為遊軍

五旅為師圖




大司馬二千五百人為師師帥皆中大夫

小司徒五旅為師每一圜為一兩二十五人四圜為一卒百人

師之為言大也衆也兵車二十五乘統二千五百人其兵衆矣故以師名大約四正四奇中握機外遊軍並當如握機八陣之制車卒伍法二十五乘為大偏以一師之車而言五十乘為卒亦曰廣合二師之車而言也

五師為軍圖



大司馬萬二千五百人為軍軍將皆命卿 小司徒五師為軍每一圜為一卒百人五圜為一旅五百人

軍之為言萬二千五百人兵車一百二十五乘大車亦如之合二車之倅為車五百乘可以自環為營故其為字以包車為文以守以戰可以無敵矣小國一軍次國二軍大國三軍天子六軍凡大將所統多多益辨用以調發應援然皆各自為營故營衛堅牢起止迅疾而無後世全軍覆沒之禍此軍所以止于萬二千五百人

車卒伍法一百二十五乘為伍指一軍之車而言也

田賦兵民起數義

按井邑丘甸溝洫澮川通成終同比旅族黨伍兩卒旅其起數皆不同者井邑丘甸縣都主于兵賦以田為事田之勢方但欲其備車馬兵器以防調發故各寓于野而以四起數遂溝洫澮川主于疏導以防水為事防水之勢長當與居其間受其利者任其事故曰井曰牧並以各水為分而以十百起數通成終同封畿者主于封

國有國之事莫急于農事莫重于兵賦故兼夫丘甸溝
洫二者一縱一橫水于是而治賦于此而定兼夫十與
四而為數也若夫比閭隣里主于教訓服役守禦以民
為事教訓必會集而後施役民必于農隙守禦宜于團
聚故皆在屯而以五起數若軍伍之法止則百人共庇
一車戰則用伍兩卒旅以為奇正更休故亦以五起數
莫不各有天然之數所以不同也或乃欲比而同之至
以井田為伍萬人為一軍何其謬哉

周禮翼傳卷一